



8.febr 2014

UPA2014/165

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Nunaqarfinni illoqarfinnilu isorliunerusuni ineqarniarnikkut pissutsit ilungersunartut qaangerniarlugit illunik nutaanik kiisalu aserfallassimasunik nutarterinissamik anguniaqarluni suliaqartoqarnissaa pillugu apeqquteqaat aallaavigalugu oqallinnissamik siunnersuut.**  
(Inatsisartunut ilaasorta q Hans Enoksen, Partii Naleraq)

Tamatta toqqissilluta pisinnaatitaaffigaarput toqqissinartumik najugaqarlutalu ineqarnissarput, tamannalu aamma tamatsinnut atuuttariaqaraluarpoq sumi najugarnerput apeqqutaatinnagu, aammalu illoqarfinni angisuuni angerlarsimaffeqanngitsorpasuit ilanngullugit eqqarsaatigalugit.

Ukiuni kingullerni nunaqarfinni illoqarfinnilu isorliunerusuni illuliornikkut annertuumik kinguariarsimavugut sanaartorneq unilluinnarsimammat, naak nalunngikkaluarlugu taakkunani illut pitsaanngitsorujussuit ilaatigut innuttaqatitsinnik inigineqaraluartut.

Tamatta peqqissuunissarput soqutigaarput, ullutsinnullu naleqquttumik ilaqutariit illoqarnissaat soqutigisariaqarparput, tassami angajoqqaat meerartallit ilaatigut najussallugit peqqinnanngitsorujussuarni najugaqartippagut, allaat oqartoqarsinnaalluni najorneqarsinnaanngitsuni aserfallassimasuni qianartunilu ilaatigullu illuni oquttuni, annerusumik eqqiluisaarnikkut uffarfeqarnikkullu perusersartarfiillu eqqarsaatigalugit kingussaasimasunik.

Kisianni aamma qujanartumik ilaat nunaqarfinni illoqarfinnilu isorliunersuni illugissaarluinnarput ullutsinnut nallersuuttunik, tamakkulu qutsannaqaat.

Taamaakkaluartoq illunik ullutsinnut naleqquttunik nutaaliornissaq nunaqarfinni isorliunerusunilu suli pisariaqartinneqaqaaq annertuumillu siuarsartariaqarluni.

Illut siulliit sananeqartartut nunaqarfinni illuliortarneq eqqunneqarmat 1975-ikkunni taamanikkut nunaqarfimmiut illoqarfinnilu isorliunerusuni illut najugarineqartut pitsanngoriarsimaqaat tamatsinnut qujassutissaasumik.

Illuliat siulliit type 69 kiisalu kingusinnerusukkut type 43-it aamma takkupput, taakkulu sanaartorlugit atorluarneqarsimaqaat, massakkulli amerlasuut assut aserfallassimapput, annertuumillu nutarterisoqanngippat isaterlugit nutaanik taasersortariaqarluinnalernikuupput. Ilaatigut suli illut type 3-nik taaneqartartut 50-sikkuni sanaat atornerqarput, eqqiluisaarnikkut periarfissaqanngivissut aserfallassimasorujussuillu, illoqarfinniippata qangali nivatarsuarnik aserorterlugit igitassaagaluit suli nunaqarfimmiut atorpaat, pissutsillu taamaannerat nunaqarfimmiut uagut akuerinngilarput.

Inuusuttut soorunami aamma nunaqarfinni inuttut ineriartornissartik pingaarteqaat, ilaqutariit namminneq illoqarnissaminnik pisariaqartitsipput, meeqqiorpummi, allamillu najugassaqaannginnamik illuni mikisuni ilaatigut amerlavallaarlutik ilaqutariit najugaqatigiittarput, tamakkulu allanngortinneqartariaqarput peqqinnarnerusumik inuuneq ingerlanneqassappat.

Naalackersuinikkut qanoq siunnerfeqarniarpugut innuttaaqatigut najugassaqartinneqarnissaannut aaqqiissutaasinnaasunik, Naalackersuisut qanoq eqqarsarpat? Aammalu ukiuni tulluuttuni aningaasalersuinissat eqqarsaatigalugit.

Isuma qarluinnarpunga nunaqarfinni illoqarfinnilu isorliunerusuni ineriartorneq siumut aallarteqqinneqassappat illuliornikkut pitsaasumik aaqqissuussinikkut alloriaqqittoqartariaqartoq. Tassami massakkut nunaqarfiit inukilliartuinnarput ilaatigut inuusuttut nunaqarfimminni illussaqaqnginnertik pissutigalugu aallartariaqartarmata.

Siornatigut aaqqissuussinertit eqquteqqinneqarnissaat illoqarnikkut isorliunersuni pissutsit pitsaanerulissappata saneqqunneqarsinnaangilaq, massakkummi pisariaqartitsineq annertoqaaq pissutsillu taamaaginnarnerat katataajartuinnarnerpullu ingerlaannarsinnaajunnaarpoq.

Taakkuinnaangillat illoqarfinni angisuuni inuit angerlarsimaffeqanngitsut aamma piaartumik ikiorsiiffiqineqarnissaat ilungersuuttariaqarparput, ineriartussanngilagut ilagut katagarlugit, ineriartussaagut ilagut peqatigalugit najugassaqartillugillu. Issittumi najugaqarpugut, silaannarmi inuusoqarsinnaangilaq. Inuit ataqqinassusiat assigiippoq! Tamannalu aallaavigalugu naalackersuinikkut aaqqissuussisariaqalerpugut, inuiaqatigiit ilatik pilliutigalugit katagarlugillu ineriartortinneqarsinnaangillat.

Oqallilluarisi.